

Häümache



An de Bückel rund üm Schnäbbärch rüm sen früher die Wiesche weit de Berch nuff gange. Zu dene Wiesche am Berch hot mer "Hemedede" gsaht. Die merschte von denen Hemedede sen in de 50er un 60er Johr mit Wallbehm eingepflanzt worn. Dodebei is de Schnäbbärcher nix bessers eigfalle, als die willhelminische Einheits-Fichte zu setze. Wenn mer häüt nüber de Heschemuti guggt, do kann mer sähe, was dodraus worn is.

Die viele Wiesche an de Berch sen domols all mit de Sensche gmöht worn. Wenns e gröüßeri Hemedede war, sen manchmols Nachbersläüt odder Verwandte mitgange, kleeneri Schtückli hot mer ällees gmöht. Zum Möhe is mer in aller Hergottsfrüh uffgebroche. Des hot gleich zwä Vordel ghat. Erschtens wars Grasch no naß vom Tau un es hot deshalb besser gschnitte und zwättens wars no net sou warm un mer hot deshalb wenicher schwitze gmöht.

Es Möhe hebbe mir scho als Kinn glernt. Jeden Daach hebbe mir e Fuddermanne voll Grasch für unser Hasche houle gmöht. Dodebei hot mers automatisch glernt un als de Vater dann e Gääs besorcht hot, do hab ich scho längscht Möhe gekönnt.

Fürs Häümache hebbe mir ganzi vier Wiesche ghat, die Schtäche, de Heddeberich, de Dummbächer uns Vordere Sennle. Blous die Schtäche war e gröüßers Schtück. Äbber alle vier Wiesche warn Hemedede, des häßt, mir hebbe alles mit de Sensche möhe gmöht.

Eines Daaches bin i also morchens um viere mit em Fahrrad naus de Dummbächer. Ich hab e korzi Hosche un Dornschuh oghat. Als i scho ogfähr die Hälft gmöht ghat hab, bin i beim Senschewetze mit em rechte Fuß de Berch nabbgrutscht un hab mer mît de Sensche ins rechte Bee ghaue.

Mit em Taschetuch hab i die vielleicht zehn Zentimeter lange Wunde zugebunne, bin uffs Fahrrad gsesse un hemm gfahrn. Unnerwechs hots im rechte Dornschuh richtig geqietscht, weil der scho voll mit Blut war. Ich bin gleich nabb zum alte Dokter Maier gfahrn. Der hot mir fünf Klammern ins Bee gmacht un alles zugebunne.

Oschließend bin i zurück naus de Dummbächer gfahrn, hab fertich gmöht un dann erscht bin i hemm zu de Modder. Ich hab nämlich Schiß ghabt, daß die ordentlich mit mer schimpfe wird, was se äbber gar net gmacht hot.